

**“Alipaa Juu Akawapa
Wanadamu Vipawa.”**



*Ushuhuda wa kibinafsi wa Kasisi Branham
wa kuja kwa kile kipawa*



Kasisi William Marrion Branham

“Alipaa Juu Akawapa Wanadamu Vipawa.”

Kuhusu kuja kwa kipawa hiki cha kuponya, naweza tu kuwasimulia jinsi lile tukio ilivyonijia. Naamini kwa unyenyekevu na uaminifu ya kwamba vipawa hukusudiwa tangu awali na Mungu. Wengi hawaamini katika kukusudiwa tangu awali, bali imethibitishwa na maandiko ya kwamba matukio mengi ya Biblia yamekusudiwa tangu awali kiungu. Kwa mfano, kuzaliwa kwa Kristo kulikusudiwa tangu awali kutoka Bustani ya Edeni. Halafu yapata miaka 712 kabla ya kuja kwa Yohana Mbatizaji, Isaya alimwona na akanena habari zake kama sauti ya mtu aliaye nyikani. Nabii Yeremia alisema ya kwamba kabla hajafanyizwa katika tumbo la mamaye, Mungu alimjua na akamchagua tangu awali nabii juu ya mataifa. Naamini ya kwamba kukusudiwa tangu awali ndicho chanzo cha kipawa hiki kwa sababu hii pia: sikuwa na msingi wa kidini. Wazazi wangu walikuwa wa dini mbalimbali na kwa sababu hiyo, mimi sikuhudhuria kanisa kamwe.

Mara ya kwanza kwangu kupata wazo juu ya mambo ya usoni, nilikuwa na umri wa kama miaka saba, baada tu ya kuanza shule katika sehemu ya mashambani maili chache kaskazini mwa Jeffersonville, Indiana, ambapo babangu alikuwa dreva wa jamaa tajiri. Daima nimependa kuvua samaki na kuwinda...hata wongofu wangu haukuondoa mambo hayo ndani yangu...na alasiri hiyo ya Septemba baadhi ya hao vijana walikuwa wamekwenda kwenye kindimbwi chenye samaki wengi, huku nami imenilazimu kumchotea babangu maji. Nasikitika kuwaambia maji hayo yalikuwa ya nini. Baba alikunywa pombe sana, na katika wakati huu walikuwa wakitengeneza chang'aa,

kwa hiyo ilinibidi kuchota maji kuyapeleka kwenye mtambo wa kutengenezea chang'aa, ambao ungeitengeneza usiku huo. Nilipokuwa ninashuka kuja kwenye kile kijia, niliweka ndoo zangu ndogo za asali chini halafu nikaketi chini ya mti kupumzika kwa dakika chache, nikilia kwa sababu nisingeweza kwenda kuvua samaki pamoja na vijana wengine. Nilipokuwa nimeketi pale chini ya mti, jambo fulani lilitukia ambalo siwezi kulisahau kamwe. Yaonekana, palitokea mvumo wa upepo kwenye majani, lakini, nilipoinua macho yangu, sikuona majani yo yote yakinikiswa wala ishara yo yote ya upepo. Nikakaa kimya, nimeduwaa huku nikishangaa hiyo sauti iliwa inatoka wapi, nilipoisikia tena, kwa hiyo nikachukua ndoo zangu nikaanza kupanda kwenda kwenye kile kijia. Wakati huu ikatokea tena, ikitoa sauti kubwa kuliko ya hapo awali, na nilipokuwa nikiangalia nyuma kuona kilichotukia, niliona ya kwamba yapata katikati ya ule mti palionekana kama kwamba pana upepo wa kisulisuli, ambamo kulitokea sauti iliyosikika ikinena maneno haya: "Usivute sigara kamwe, usinywe pombe, ama kuuchafua mwili wako kwa njia yo yote, kwa maana pana kazi utakayofanya utakapokuwa mkubwa zaidi." Niliogopa sana sikujua la kufanya. Huku nikipiga mayowe na kukimbilia nyumbani, niliiangukia mikononi mwa mamangu, ambaye alifikiri nimeumwa na nyoka. Nilimwambia nilikuwa tu nimeogopa sana, kwa hiyo akanilaza kitandani naye alikuwa anaenda kumwita daktari, akifikiri nilikuwa nimeshikwa na mshtuko mkubwa. Naam, marafiki, ninajua ya kwamba watu wengi wangeidhihaki hadithi hii, bali siwezi kuwajibika kwa yale wasemayo watu wengine. . . Ninawajibika tu kwa ujasiri wangu mwenyewe. Isitoshe, sikupita karibu na huo mti tena. Ningezunguka upande wa pili wa lile shamba kuuepa, kwa maana nilifikiri yupo mtu juu ya mti ule. Nami ningali naamini alikuweko mtu kwenye ule mti. Ilikuwa ni malaika wa Mungu, na katika miaka ya baadaye, nilikutana naye uso uso kwa uso na kuzungumza naye.

Majuma machache baadaye, nilikuwa ninacheza gololi na ndugu yangu, wakati nilihisi jambo la ajabu. Nikaketi chini karibu na mti, na, kama kwamba nilikuwa katika usingizi mzito sana, niliona daraja kubwa likiinuka na kuuvuka mto, na nikaangalia huku baadhi ya watu wanaanguka mtoni na kufa maji. Nilipopata kujirudia, nilikimbia nikamwambia mamangu, ndipo tena akaona ya kwamba nilikuwa mtoto mwenye wasiwasi. Miaka ishirini na miwili kutoka wakati huo, daraja la Manispaa lilijengwa kukingama Mto Ohio, na idadi ile ile ya wafanya kazi ilikufa maji, kwa kuanguka kutoka kwenye lile daraja. Mnaona, mambo haya hayakuja kwa maombi wala shauku, bali yalikusudiwa tangu awali katika mapenzi ya kiungu ya Mungu.

Tukio lingine la namna hii lilitukia siku moja nilipokuwa nikienda mtoni pamoja na baba yangu na mtu mwininge. Walikuwa wamenipa chang'aa ninywe, na kwa sababu nilitaka kupata kibali kwa mtu huyo ili aniazime boti yake, nilianza kunywa ile chang'aa. Bali kwa kweli kama ninavyozungumza leo, niliisikia sauti ile kama kuvurumishwa kwa majani. Nilipoangalia kila mahali, na bila kuona majani yo yote ama dalili ya upepo, niliweka ile chupa kinywani mwangu tena, ndipo nikasikia sauti ile ile, ila ikitoa sauti kubwa zaidi. Nikajawa na uoga kama hapo awali; nikaangusha ile chupa nikakimbia mbio, huku babangu mwenyewe ananiita dondonadume. Loo, jinsi jambo hilo liliyyoudhil! Baadaye, nilitwa dondonadume na msichana mdogo mpenzi wangu nilipomwambia sivuti sigara. Kwa kuchukizwa na dhihaka lake, nikaitwaa ile sigara na nilikuwa nataka kuivuta hata hivyo; nilipokatizwa na sauti ile ijulikanayo, ikanifanya niitupe chini ile sigara na kuondoka mahali pale nikilia kwa maana nisingekuwa kama vijana wengine, huku dhihaka la umati huo likilia maskioni mwangu. Haya ni machache tu ya mambo mengi ya namna iyo hiyo yaliyotendeka kote maishani. Daima kulikuwa na kule kuhisi kwa kipekee, kama kwamba mtu fulani amesimama karibu nami, akijaribu kuniambia jambo fulani, na

zaidi sana nilipokuwa peke yangu. Hakuna mtu aliyeonekana ananielewa kabisa. Vijana ambao ningaliandamana nao hawakutaka kushirikiana nami kwa maana nisingevuta sigara wala kunywa pombe, na wasichana wote walienda kucheza dansi, ambayo nisingeweza kushiriki pia, kwa hiyo ilionekana ya kwamba maishani mwote nilikuwa tu mtu asiye na mwensiwe, sikujua mtu alienielewa, na bila hata kujielewa mwenyewe. Bali sikujua yale siku kuu za usoni zilikuwa zikishikilia kama ninavyoja sasa.

Tukio jingine muhimu ninalokumbuka lilitokea nilipokuwa na umri wa karibu miaka kumi na tisa. Nilikuwa nikitembea kwenye uwanja wa maonyesho usiku mmoja pamoja na vijana wengine, wakati sauti ilipoita, "Aisee, wewe! Njoo hapa!" Nilipoangalia nyuma, nikamwona kijana mwanamke ameketi chini ya hema, mnajimu. Akanipungia mkono niende kwake, na, huku nikifikiri alitaka nimfanyie jambo fulani, nilikubali. Akasema, "Aisee, unajua ya kwamba ulizaliwa chini ya ishara na kuna nyota inayokufuata? Ulizaliwa ukiwa na kipawa." Bila shaka, vijana wakaanza kunitania juu ya 'kuwa na kipawa,' kwa hiyo nikajaribu kulipuuza na tamshi fulani kwa yule bibi, ambaye aliniambia ya kwamba ingawa ninachukia ye ye kuniambia jambo hilo, siku moja nitafahamu alilokuwa anamaanisha. Nikajaribu kusukumia mambo haya nyuma ya bongo langu, huku ninafanya kazi mbalimbali, bila kuridhika, nikienda huku na huko, ikanilazimu kupatwa na msiba wa kufiwa na mke na mtoto wangu, na misiba mingine mingi ambayo ilikuwa karibu zaidi ya yale moyo wa binadamu ungeweza kustahimili. Nilitafuta amani na ridhaa katika kila kitu kinachowenza kuwaziwa, bali yaonekana kuna mahali pa yapata inchi kumi juu ya ubavu wa tano wa mwili wa mwanadamu ambapo hapatajaa mpaka Kristo aingie. Na mbali na misiba yangu binafsi, kulikuwa daima na kule kuhisi kwa kitu kinachoning'inia juu yangu, kikiniongezea huzuni. Hatimaye, kupenda kwangu maumbile kukaniingiza katika kazi kama mlinzi

wa wanyama pori katika mkoa wa Indiana, ambayo ilinipeleka katika sehemu mbalimbali za mkoa huo.

Siku moja nilikuwa nimesimama katika basi lililojaa watu lililokuwa likienda Henryville, Indiana, na, huku nikijisikia kwamba mtu fulani alikuwa ananiangalia, niligeuka nikayaona macho mawili shupavu ya kijivu, yaliyokuwa ni ya bibi aliyeonekana mzuri sana. Akaniambia, "U mpweke, sivyo?"

"La, mama," nikajibu na kuendelea kuangalia nje ya dirisha, nikifikiri alikuwa anavutiwa na ile yunifomu na alikuwa anataka tu kuzungumza.

Akanena tena, "Labda itanibidi kujieleza. Mimi ni mnajimu."

"Vema," nikawaza, "aheri nisikie analotaka kusema."

"Bila shaka unachukia jambo hili, sivyo?"

"Naam mama, ninalichukia."

"Unafikiri ninataka kukuzungumzia juu ya dini, sivyo?"

"Sijui."

"Wewe ni mwana dini, sivyo?"

"La mama."

"Labda ningeweza kukwambia jambo fulani juu yako. Umetoka magharibi, sivyo?" ye yeakaniswali.

"La mama."

"Basi unataka kwenda magharibi."

"Loo vema, hilo ni tofauti. Daima nimetaka kwenda magharibi," nikajibu, nikifikiri ningemwacha aendelee kuzungumza kisha niyaliganishe na yale wanajimu wengine walikuwa wanasesma.

"Sababu yake ni kuzaliwa kwako," akaendelea.

"Unajua nini juu ya kuzaliwa kwangu?" nikauliza kwa hamu ya kutaka kujuua.

"Ewe kijana, kama nikikwambia saa yenyewe uliyozaliwa, utaniamini mimi?"

"Vema, mimi ni wa kimsingi kabisa, na kama mtu akiniambia ukweli, sina budi kuamini," nikajibu. Na ningali ninaamini jambo hilo—kama ni kweli, ni kweli.

Vema, usiniulize jinsi alivyotenda jambo hilo, bali aliniambia dakika ile ile niliyoziwi. Palikuwa na kijana baharia aliyekuwa amesimama karibu nami, nami nikamuuliza kama angaliweza kumwambia siku aliyoziwi. Akasema asingeweza, na, bila ya kuelewa jambo hili, niliswali kwa nini yeze angeweza kuniambia na hangeweza kumwambia yeze. Akasema ni kwa sababu kulikuwa na ishara iliyokuwa ikinifuata...na moyo wangu ukafadhaika, kwa maana jambo hilo lilinifanya kukumbuka dhahiri yale hao wengine walikuwa wameniambia. Akaniuliza kama mnajimu amewahi kuzungumza nami hapo kabla, nami nikamwambia la, nikimdanganya yule bibi.

"Unajua lo lote juu ya Yesu Kristo?" akauliza.

"Najua alidhaniwa kuwa mwana wa Mungu," ndio tu niliyoweza kusema.

"Unajua lo lote juu ya jinsi alivyoziwi?...Nini kilichokuja kwamwabudu kwanza?"

"Mamajusi watatu, kama nikikumbuka vizuri."

"Walikuwa wakifuata nini?" akaendelea.

"Nyota, naamini."

"Hiyo ni kweli. Basi hapana budi walikuwa wanajimu, kwa maana walikuwa wakizitazama nyota," akathibitisha. "Ewe kijana, nimezungumza na watu katika lkulu. Nilimwonya awali Rais Harding juu ya kifo chake cha kipekee, nami nina mambo ya kuzungumza nawe. Ulizaliwa chini ya nyota fulani upate kuwa mtu mwenye kipawa. Hivi mhudumu ye yote hajakwambia jambo hilo?"

"Mimi sina uhusiano wo wote na wahudumu," nikajibu.

"Basi nisikize. Wakati Yesu Kristo alipozaliwa, palikuwa na mamajusi watatu kutoka Mashariki waliofuta kilichoitwa nyota na watu wengi; bali kwa kweli kulikuwa na nyota tatu zilizokutana Bethlehemu, na zilipoungana pamoja, zikafanyiza nyota moja iliyoning'inia juu ya Kristo. Wakati huo, Mungu alituma Kipawa kikubwa sana alichowahi kuukabidhi ulimwengu, Mwanawe wa pekee. Wakati wale mamajusi walipoondoka, hizo nyota tatu zikatengana na hazijakutana tena. Mungu daima hutangaza kazi Zake mbinguni kabla hajazitangaza duniani, na hawa mamajusi walikuwa wakingojea kutimizwa kwa unabii wa nabii Balaamu ya kwamba nyota ingeinuka itoke katika Yakobo," akaendelea, akinukuu maandiko mengi ambayo sikuwa ninayajua, bali nikasikiliza kwa makini alipokuwa anaendelea. "Sasa nyota hizi hazijakutana tena, bali kila baada ya miaka michache zinavuka mizingo yao, na wakati jambo hili linapotukia inaonyesha ya kwamba kwa kutoa heshima za kuzaliwa kwa Yesu, kuna kipawa kingine kimetumwa ulimwenguni tena. Na wakati wewe ulipozaliwa, nyota hizi zilipitana. Kulikuwa na nyota iliyokuwa inakufuata ulipoingia kwenye basi hili huko Jeffersonville; nilionna hiyo nyota juu yako, nami sielewi kwa nini watu wengine hawajakwambia jambo hilo hapo kabla."

Kusudi mtu asije akaelewa vibaya, baadaye nitaonyesha ya kwamba unajimu unapingana na maandiko na bila shaka si jambo la kuchezewa na Mkristo (Isaya 47: 13, 14) na taarifa hii ya mnajimu juu ya ile nyota ya Kristo ni maelezo yake, na haimo katika maandiko. Bali ni ni jambo la kimaandiko kwa hata Shetani kushuhudia kipawa cha Mungu, na hiyo ndiyo sababu ya kusimulia mazungumzo haya.

Kufikia wakati huo, unaweza ukawaza nilivyokuwa ninajisikia. Nilipofika nilipokuwa ninaenda, nilimshukuru yule bibi nikashuka

kwenye lile basi, lakini nisingeweza kupuuza kule kuhisi kwa ajabu kulikonifuata daima, kukisababisha niwe mwenye wasiwasi na kushtuka-shtuka, mwenye mashaka mbele ya watu, hata hivyo nikiogopa sana kuwa peke yangu, huku nikiogopa kila wakati upepo ungevuma. "Haya yote yana maana gani?" nilijiuliza mara kwa mara. Muda mfupi baada ya mambo hayo niliongoka na nikayatoa maisha yangu kwa Kristo. (Nimeandika muhtasari wa maisha yangu katika kitabu kidogo kinachoitwa "Yesu Kristo Yeye Yule Jana, Leo na Hata Milele.") Baada ya kuongoka kwangu, ambako kulitukia katika kibanda kidogo nyuma ya nyumba yetu, nilijiunga kwa muda na kanisa la Kibatisti na nikawa mzee wa mahali hapo, huku nikiwekewa mikono na Dk. Roy Davis wa Jeffersonville. Baada ya ufufuo uliofanikiwa wa hema kule, walinijengea maskani, ambayo ingali iko kwenye Barabara ya 8 na ya 10, yanayoitwa Maskani ya Branham, na kwa miaka kadha nilikuwa kwa namna fulani mhudumu aliyefanikiwa, baada ya kuwabatiza watu elfu kadha na kuona wengi wameokolewa kwa utukufu wa mwenyezi Mungu. Hata wakati huo nilifanikiwa katika kuwaombea wagonjwa, ingawa wakati huo sikujua bado maana yake, na mara nyingi maono na mambo ya ajabu yangenijia, jambo ambalo baadhi ya watu wanaoishi karibu na Jeffersonville wanaweza kuhakikisha. Wakati mmoja hasa ambao naweza nikataja: Nilikuwa mahali fulani kwenye Mto Ohio, nikibatiza kundi kubwa la watu walioongoka, kati ya halaiki kubwa ya watu waliokusanyika ukingoni kushuhudia ibada hiyo. Ilikuwa alasiri yenyе joto, na hapo wakati anga lilikuwa kama shaba, nyota kubwa mno yenyе kung'aa ilikuja na kuning'inia mahali nilipokuwa nimesimama. Wengi wenu mtakumbuka mlisoma hayo katika magazeti. Imeonekana mara nyingi tangu wakati huo. Juzijuzi nilikuwa katika jiji kubwa kwa ajili ya ibada za siku tatu usiku, mionganoni mwa mamia ya watu. Wa kwanza niliywombea alikuwa mtoto mdogo, ambaye miguu yake ilijikunyata kwa polio, ikimfanya kutembea kwa vidole vyake. Kama kawaida katika mikutano yetu, wasikizi walikuwa

wameketi huku wameinamisha vichwa kwa kicho huku nami nimemshika yule kijana mikononi mwangu na nilikuwa nikimwombea, wakati ilipoonekana kama kwamba nuru yenyekunga'aa ilielekezwa kwangu. Basi nikashangazwa na ujeuri wa bawabu wa kunimulika, na nilipoyafungua macho yangu kwa mshangao, hapo mbele yangu palisimama ile nyota ya asubuhi! Nikamwangusha huyo kijana mdogo, ama kweli aliruka akatoka kwenye mikono yangu...sikujua yaliyotukia, kwa kuwa ilionekana kwamba kila neva mwilini mwangu ilikufa ganzi. Alipogusa sakafu miguu yake ikawa mizima, na kwa mara ya kwanza maishani mwake akatembea kama kawaida kutoka jukwaani. Makutano walipiga makelele; mamake akazimia; msichana Mnazarayo, aliyekuwa rafiki wa yule mtoto, alikuwa akicheza piano, "Ni Tabibu Wa Karibu," na wakati alipoona muujiza uliofanywa na Bwana wetu mpendwa Yesu, aliruka akakimbia yapata futi kumi na tano toka kwenye piano, huku ameinua mikono yake, akilia na kupaza sauti...nami najua linaonekana lisiloaminika, bali mamia wanaweza kuhakikisha jambo hili...piano ile haikukosea wimbo, bali iliendelea tu kuuimba ule wimbo. Mambo mengi makuu yalitukia. Zaidi ya watu mia saba waliyatoa maisha yao kwa Kristo usiku huo. Wengi wenu enyi watu mliokuwepo pale mtasoma haya...Mungu awabariki. Ningali nikijaribu kufanya yote niwezayo kwa ajili ya Kristo.

Sasa kwa kuelezea habari za swalii ambalo huzuka mara nydingi. Wahudumu wengi wameniuliza, "Ndugu Branham, wasemaje juu ya unajimu? Unafanya haya kwa nguvu za unajimu, na kama sivyo, mbona unawapa hao wanajimu sifa mbele za watu kwa kuwa walitabiri jambo hili?" Naweza tu kusema jambo hili: niambieni mahali pamoja ulimwenguni ambapo nguvu za unajimu zinawaponya wagonjwa. Kati ya watazama nyota wote, wapiga ramli, vijumbe, nk. ambao ulimwengu unawajua, niambieni ambapo mmoja ameyafungua macho ya vipofu, akawafanya viziwi kusikia ama bubu kunena.

Kuna njia moja tu...katika Jina la Yesu Kristo na damu Yake iliyomwagika pale Kalvari. Lakini jambo ambalo ni geni sana kwangu, (katika siku zilizopita na pia siku hizi,) ni kweli kama hizi zifuatazo: wakati kile Kipawa kilipokuwa kimelala horini, makuhani walikuwa hekaluni wakihojiana kama kulikuwa na ufufuo wo wote wa wafu ama haukuweko, na wakati uo huo, kundi la mamajusi walikuja kutoka mbali na wakakitambua Kipawa cha Mungu duniani. Kwa kweli, nasema unajimu ni nguvu ile nyingine, lakini hata ibilisi hana budi kushuhudia kipawa cha Mungu. Hao mamajusi na wawe wo wote wale ama cho chote kile...wao *kweli* walikishuhudia kipawa cha Mungu na wakaja kumwabudu Yeye kabla ya wale makuhani hekaluni kufanya hivyo. Na pia wakati Paulo na Sila walipokuwa Filipi, na makuhani na wahudumu wa jiji lile walikuwa wanawaita wadanganyifu na kuwapeleka gerezani, maskini mpiga ramli mmoja aliwapaaazia watu sauti ya kwamba watu hao walitumwa na Mungu kuwaonyesha njia ya wokovu. Si ajabu ya kwamba maskini huyu msichana mtumwa, aliye pagawa na roho mchafu, alitambua nguvu za Mungu katika Paulo na Sila, wakati wale viongozi hata hawakuwakubali. Je, halikuwa la ajabu kwamba, katika tukio lingine, wakati wengi walikuwa wakisema Yesu alikuwa Beelizebuli, pepo waliokuwa ndani ya mtu fulani walilia wakasema walijua Yeye alikuwa nani...pepo wakikiri uungu Wake, nao Mafarisayo wakisema Yeye alikuwa ibilisi. Na ndivyo ilivyo leo, ya kwamba wengi wanatilia shaka na kuzozana wenyewe kwa wenyewe juu ya mafundisho yao na nadharia zao, na wakiwazuia watu kuhudhuria mikutano ya kuponya, huku kipawa cha Mungu kinaendelea kutenda kazi duniani na wengi wao wanakikosa. Loo, enyi makasisi! Namtumainia Mungu kwamba mtaamka. Si kwa sababu nilifanywa mbebaji wa kipawa hiki; mimi sihusiki kamwe na kuja kwake...Mungu ndiye aliye kituma. Wakati wana wa Israeli walipokuwa kule chini Misri wakilia wapate mkombozi, Mungu alimtuma malaika Wake kwa Musa. Musa hakuhusika na jambo hilo...malaika wa Mungu

ndiye aliyefanya ile kazi, akafanya ile miujiza. Musa alikuwa tu mnenaji wa malaika wa Mungu; na hivyo ndivyo nilivyo tu leo...mnenaji tu wa yule malaika.

Sina budi kuwaambieni juu ya yule malaika na kuja kwa kile Kipawa. Sitasahau kamwe wakati huo, tarehe 7 Mei, 1946... msimu mzuri sana wa mwaka Indiana, ambako nilikuwa ningali ninafanya kazi kama mlinzi wa wanyama pori. Nilikuwa nimekuja nyumbani kula chakula cha mchana, nami nilikuwa tu ninazunguka nyumbani nikiivu bunduki yangu, wakati rafiki msiri wangu aliponikaribia na kuniomba niandamane naye kwenda Madison alasiri hiyo. Nikamwambia haingewezeekana kwa maana ilinibidi kulinda zamu, na wakati nilipokuwa ninazunguka nyumba chini ya mti wa mtakawa, ilionekana kama kwamba sehemu yote ya juu ya huo mti ilivunjika. Ilionekana kama kwamba kitu fulani kilishuka katika kwenye mti huo kama upepo mkuu ukienda kasi... Nikayumbayumba... wao wakanikimbilia... mke wangu akatoka nyumbani, ameogopa, na kuniuliza kuna nini. Huku ninajaribu kujishikilia, niliketi chini nikamwambia ya kwamba baada ya miaka hii yote ishirini na kitu ya kujiliwa na hisia hii ya ajabu, wakati umewadnia inaponibidi kujua maana ya haya yote, la sivyo sitarudi tena. Nilikuwa nimefikia upeo. Nilimuaga yeye na mtoto wangu, na nikamwonya ya kwamba kama sitakuwa nimerudi katika siku chache, asinitafute kamwe. Na hapa, ewe msomaji mpendwa, ndipo pana sehemu ya tukio hili la ajabu ambalo lina uhusiano fulani na kuponywa kwako, kwa hiyo some kwa maombi na kwa uangalifu. Alasiri hiyo nikaondoka nikaenda mahali pa faragha kuomba na kusoma Biblia yangu. Nikazama sana katika maombi; ilionekana kama kwamba nafsi yangu yote ingetenguka. Nikalia mbele za Mungu...Nikajilaza kifudifudi. Nikainua macho yangu kwa Mungu na kulia, "Iwapo utanisamehe kwa yale niliyoyafanya, nitajaribu kufanya vizuri zaidi...Ninasikitika ya kwamba nimekuwa mzembe miaka hii yote katika kufanya kazi uliyotaka niifanye...je, utazungumza nami kwa namna fulani, Mungu? Kama hunisaidii, siwezi

kuendelea." Ndipo mnamo usiku, yapata saa tano, nilikuwa nimeacha kuomba na nilikuwa nimeketi nilipoona taa ikisinzia mle chumbani. Huku nikifikiria kwamba mtu fulani alikuwa akija na tochi, niliangalia nje ya dirisha, bali hapakuwepo na mtu, na nilipoangalia tena, ile nuru ilikuwa inatandaa sakafuni, ikienea. Sasa najua jambo hili linaonekana geni kwenu, kama lilivyonekana kwangu pia, bali kumbukeni, kuponywa kwenu kunategemea kama mnaamini jambo hili au la, kama mtakavyoona baadaye. Wakati nuru ile ilipokuwa ikitandaa, bila shaka nilipatwa na wasiwasi na nikaanza kuamka kitini, lakini nilipokuwa nikiinua macho yangu, pale ilisimama nyota ile kuu. Hata hivyo, haikuwa na ncha tano kama nyota, bali ilionekana zaidi kama bonge la moto ama nuru, ikiangaza sakafuni. Mara nikasikia mtu fulani akitembea sakafuni, jambo ambalo liliinishtusha tena, kwa maana sikujua mtu ambaye angekuja pale mbali na mimi. Naam, huku ikija kuititia ile nuru, niliona miguu ya mtu ikinijia, kwa kawaida tu kama vile wewe ungalinijia. Alioneckana kuwa mtu ambaye, katika uzito wa kibinadamu, angekuwa na uzito wa ratili mia mbili, amevaa vazi jeupe, mwenye uso mwororo, hana ndevu, bali alikuwa na nywele nyeusi zilizofika kwenye mabega, ni mweusi kwa namna fulani, akiwa na uso wa kupendeza sana, na alipokaribia, macho yake yakaangaliana na yangu, na alipoona jinsi nilivyokuwa na woga, akaaza kunena. "Usiogope. Nimetumwa kutoka katika uwepo wa Mwenyezi Mungu kukwambia ya kwamba maisha yako ya kipekee na njia zako zilizoleweka vibaya zimekuwa za kuonyesha ya kwamba Mungu amekutuma kuwapelekea watu wa ulimwengu kipawa cha kuponya kiungu. IWAPO UTAKUWA MWAMINIFU, NA UNAWEZA KUWAFANYA WATU WAKUAMINI, HAKUNA KITAKACHOWEZA KUSIMAMA MBELE YA MAOMBI YAKO, SI HATA KANSA." Maneno hayawezi kuelezea jinsi nilivyojisikia. Aliniambia mambo mengi sana ambayo sina nafasi ya kuyanakili hapa. Aliniambia jinsi ningeweza kujua magonjwa kwa mitetemo ya mkono wangu. Akaondoka, lakini nimemwona

mara nydingi tangu wakati huo. Yeye amenitokea, labda mara moja ama mbili katika muda wa miezi sita na amenena nami. Mara chache ameonekana wazi mbele ya watu wengine. Sijui yeye ni nani, najua tu ya kwamba yeye ni mjambe wa Mungu kwangu.

Bila shaka, nilianza kuwaombea wagonjwa. Mimi sida kupachukua mahali pa daktari... Nafikiri Mungu aliwaweka madaktari hapa kuyasaidia maumbile, bali wao ni wanadamu tu... Mungu ni mwenyezi. Mambo makuu ambayo yametendeka katika miezi hii ishirini na mmoja ni mengi kupita kiasi hatia hayawezi kunakiliwa, bali Mungu amethibitisha maneno ya yule malaika wakati baada ya wakati. Viziwi, bubu, vipofu, na kila namna ya magonjwa yamekwisha ponywa, na maelfu ya ushuhuda yamenakiliwa kufikia wakati huu. Mimi sina nguvu zangu mwenyewe kufanya hivi... Mimi ni binadamu asiye na nguvu mpaka ninapohisi uwepo Wake. Watu wengi ambao wamehudhuria mikutano hii wanajua wameambiwa magonjwa yao na dhambi zao moja kwa moja kutoka jukwaani. Msomaji mpendwa, naomba usielewe vibaya, njia yangu ya kijinga ya kujaribu kukusimulia haya yote. Nasema hivi kusudi upate kuwa na ufahamu dhahiri wa jinsi ya kufaidika na kipawa cha Mungu. Aliniambia niwe mwaminifu na kuwafanya watu waamini, na hivyo ndivyo ninavyojaribu kufanya. Kumbuka, hatuswali uwezo wa Mungu; tunajua ya kwamba Yeye anaweza kufanya mambo yote, bali shida ni kumfanya mwanadamu mmoja kumwamini mwengine. Mungu daima ana kitu ama mtu fulani wa kufanya kazi, nami ni chombo tu anachotumia Yeye. Hakuna mwanadamu anayeweza kusifiwa kwa kufanya muujiza, nami ni binadamu tu. Sijui ni muda gani zaidi Mungu ataniruhusu kufanya jambo hili, bali kwa neema Yake, ninakusudia kumtumikia Yeye vizuri niwezavyo kwa kuwatumikia watu Wake mradi tu ananiruhusu kuishi.

Katika kumalizia, kwenu ninyi mnaotafuta kuponywa katika mikutano hii. Hebu niwaachie kanuni hizi mbili ambazo hamna budi kuzifuata, kusudi mpokee kile mnachotarajia kutoka kwa Mungu.

1. Hamna budi kuamini taarifa hii ambayo nimewapa, na ya kwamba Kipawa hiki cha Kuponya, kilichotolewa na Bwana Yesu Kristo, ni njia ambayo Mungu ameitoa kwa ajili ya kuponywa kwako.
2. Ahidi kumwishia Mungu kwa moyo wako wote maishani mwako mwote.

Kilipigwa chapa katika Kiingereza kwenye miaka ya 1950.

Kilipigwa chapa tena katika Kiingereza mwaka wa 1991.

Kilipigwa chapa katika Kiswahili mwaka wa 1992.

SWAHILI

©1992 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Ilani ya haki ya kunakili

Haki zote zimehifadhiwa. Kitabu hiki kinaweza kuchapishwa kwa matbaa ya nyumbani kwa matumizi ya kibinagsi ama kusambaza, bila malipo, kama chombo cha kuitangazia Injili ya Yesu Kristo. Kitabu hiki hakiwezi kikauzwa, kunakiliwa kwa wingi, kuwekwa kwenye mtandao, kuhifadhiwa kikatolewe tena, kufasiriwa katika lugha zingine ama kutumiwa kuomba fedha bila idhini halisi iliyandikwa moja kwa moja kutoka Voice Of God Recordings®.

Kwa habari zaidi ama kwa vifaa zaidi, tafadhali wasiliana na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org